

14 AUG 2002

Mahathir-Kabinet

KABINET BERJAYA TADBIR NEGARA SEHINGGA DIKAGUMI, KATA DR MAHATHIR

PUTRAJAYA, 14 Ogos (Bernama) -- Datuk Seri Dr Mahathir Mohamad berkata barisan Kabinet yang diketuainya telah berjaya membuktikan kemampuannya untuk membangun dan mentadbir negara sehingga dikagumi oleh negara lain.

Perdana Menteri berkata ramai orang tidak mengetahui bahawa mesyuarat Kabinet yang berlangsung pada hari Rabu setiap minggu itu berjalan dalam keadaan yang ceria dengan pelbagai perkara menjadi perbincangan dan perbincangan.

"Kabinet kita ini, yang mana kita semua tahu dan orang lain tidak tahu, adalah agak relaks, lebih relaks daripada kabinet-kabinet negeri lain. Kadang-kadang kita terdengar ketawa yang besar dalam Kabinet seolah-olah mereka tak serius, macam menghadiri majlis sosial saja.

"Tapi sama ada kita ketawa, kita bergurau atau pun tidak, hakikatnya ialah Kabinet negara ini telah membuktikan kemampuannya untuk membangun dan mentadbir negara kita ini sehingga dikagumi negara lain," katanya semasa berucap pada jamuan tengah hari Kabinet hari ini sempena tamat tempoh Tan Sri Pandikar Amin Mulia sebagai anggotanya.

Pandikar Amin terpaksa melepaskan jawatan Menteri di Jabatan Perdana Menteri yang disandangnya sejak 25 Mei 1999 setelah tamat tempoh maksimum perkhidmatan sebagai senator selama dua penggal.

Beliau menjadi senator bagi penggal pertama pada 1987 hingga 1989 dan dilantik bagi penggal kedua dari 20 Mei 1999 hingga 19 Mei lepas.

Dr Mahathir berkata anggota Kabinet juga berasa sedih kerana Pandikar Amin yang berusia 47 tahun terpaksa meletak jawatannya walaupun masih lagi berminat untuk berkhidmat.

"Memang susah untuk memisahkan diri daripada sesuatu jawatan, terutama daripada Kabinet. Ia adalah sesuatu yang amat menyedihkan. Ini kerana Kabinet merupakan tempat kita menentukan nasib negara dan kaum bangsa.

"Dengan itu kita mungkin berasa terpisah lebih daripada biasa dan persaraan itu merupakan sesuatu yang menyedihkan walaupun bagi sesetengah orang ia merupakan pelepasan daripada satu tanggungjawab yang berat," katanya.

Perdana Menteri berkata beliau amat menghargai khidmat, pandangan dan nasihat yang diberikan oleh seseorang menteri semasa mereka berada dalam Kabinet.

Sambil mendoakan Pandikar Amin sentiasa berada dalam keadaan baik, Perdana Menteri berharap beliau akan terus bergiat aktif dalam politik, dan mungkin dilantik kembali menyertai Kabinet menerusi saluran lain dengan bertanding dan memenangi pilihan raya.

"Insya-Allah apabila kita memerlukan bantuan daripadanya, maka saya yakin kita akan dapat bantuan itu dan beliau tidak akan teragak-agak membantu kita dalam apa jua bidang," katanya.

-- BERNAMA

HS AHH NMO